



Menjunjung Kasih Tuanku

MAJLIS PENYERAHAN ZAKAT PENDAPATAN
SECARA POTONGAN BULANAN

OLEH KDYMM AL AMINUL KARIM SULTAN SALLEHUDDIN
IBNI ALMARHUM SULTAN BADISHAH
SULTAN NEGERI KEDAH

ZAKAT PENDAPATAN

PERLAKSANAAN SERUAN WAJIB
DI NEGERI KEDAH

ZAKAT PENDAPATAN : PERLAKSANAAN

ARAHAN WAJIB DI NEGERI KEDAH

LEMBAGA ZAKAT NEGERI KEDAH

Cetakan Pertama 2020

© Hak Cipta Lembaga Zakat Negeri Kedah, MALAYSIA

Hak Cipta Terpelihara

Tidak dibenarkan mengeluar ulang mana-mana bahagian daripada buku ini yang boleh diterbitkan semula, disimpan untuk pengeluaran atau ditukar kepada sebarang bentuk dengan ap acara sekalipun tanpa izin bertulis daripada Lembaga Zakat Negeri Kedah (LZNK).

Perpustakaan Negara Malaysia

Data Pengkatalogan-dalam-Penerbitan

Zakaria Othman

ZAKAT PENDAPATAN: PERLAKSANAAN ARAHAN WAJIB DI NEGERI KEDAH

Diterbitkan dan dicetak:

Lembaga Zakat Negeri Kedah (LZNK)

Aras 3, Menara Zakat,

Jalan Teluk Wan Jah,

05200, Alor Setar, Kedah.

Tel: 04-7331740 Faks: 04-7320634

TITAH PERLAKSANAAN ARAHAN WAJIB POTONGAN GAJI ZAKAT PENDAPATAN

Beta menitahkan, kepada semua ketua jabatan, di agensi kerajaan dan swasta, untuk melaksanakan, arahan wajib potongan gaji, untuk zakat pendapatan, mengikut taksiran yang betul, bagi kakitangan awam dan swasta, yang mempunyai pendapatan, melebihi nisab yang telah ditetapkan.

Beta turut menitahkan, kepada setiap individu, agensi dan syarikat korporat, yang bekerja dan beroperasi di Negeri Kedah, haruslah membayar zakat, kepada Lembaga Zakat Negeri Kedah.

Selaku Ulil Amri di Negeri Kedah ini, Beta berhasrat dan ingin memastikan, agar para asnaf di Negeri Kedah, yang layak menerima zakat, mendapat hak mereka, yang sewajarnya.

Petikan Titah Ucapan Kebawah Duli Yang Maha Mulia Tuanku Sultan Negeri Kedah Darul Aman Di Majlis Perasmian Pusat Bekalan Makanan Fakir Dan Miskin (Foodbank) Lembaga Zakat Negeri Kedah Dan Pelancaran Sambutan 350 Tahun Seruan Berzakat Di Negeri Kedah Di TH Hotel & Convention Centre, Alor Setar, Pada Hari Selasa 10 Rabiul Akhir 1441 Bersamaan Bersamaan 4 Februari 2020.



Perutusan

YB SETIAUSAHA KERAJAAN NEGERI KEDAH MERANGKAP PENGERUSI LEMBAGA ZAKAT NEGERI KEDAH

Assalamualaikum Warahmatullahi Wabarakatuh,

Alhamdulillah, setinggi kesyukuran dirafa'kan kepada Allah S.W.T., kerana dengan limpah izin-Nya, Lembaga Zakat Negeri Kedah dapat menerbitkan buku "Zakat Pendapatan : Perlaksanaan Arahan Wajib Di Negeri Kedah".

Lembaga Zakat Negeri Kedah (LZNK) selaku pemegang amanah oleh Ulil Amri iaitu Kebawah Duli Yang Maha Mulia (KDYMM) Sultan Negeri Kedah bertanggungjawab sepenuhnya dalam segala urusan yang berkaitan kutipan dan agihan zakat di Negeri Kedah Darul Aman.

Berdasarkan titah Tuanku Sultan Negeri Kedah dan keputusan Fatwa berkaitan kewajipan zakat pendapatan yang telah wujud, maka saya menyeru kepada seluruh majikan dan kakitangan yang beragama Islam untuk menunaikan zakat pendapatan mengikut taksiran yang ditetapkan seterusnya memberi kerjasama sepenuhnya kepada pihak LZNK.

LZNK kini mengorak langkah dengan lebih efektif dan berinovasi sesuai dengan keadaan semasa pada masa kini seperti potongan zakat pendapatan bulanan secara teratur di bawah skim "Barakah" atau membayar terus melalui aplikasi jom.zakatkedah.com.my.

Saya amat yakin dan percaya bahawa zakat pendapatan dapat membantu dalam mengurangkan kadar bilangan asnaf di Negeri Kedah Darul Aman. InsyaAllah, zakat anda mampu merubah kehidupan asnaf di Negeri Kedah ke arah yang lebih baik dan sempurna.

**Dato' Paduka Ammar Bin
Dato' Shaikh Mahmood Naim
DPSS., DSDK., JSD., SSS., AMK., AMN., BCK.
Setiausaha Kerajaan Negeri Kedah Darul Aman
Merangkap Pengerusi Lembaga Zakat Negeri Kedah**



Sekapur Sireh
**SAHIBUS SAMAHAH MUFTI KERAJAAN
NEGERI KEDAH**

Assalamualaikum Warahmatullahi Wabarakatuh,

Alhamdulillah, segala puji bagi Allah SWT, selawat dan salam ke atas junjungan besar Nabi Muhammad SAW serta keluarga baginda. Bersyukur kepada Allah SWT kerana dengan izinNya pihak Lembaga Zakat Negeri Kedah dapat mengeluarkan buku "Zakat Pendapatan: Arahan Perlaksanaan Arahan Wajib Di Negeri Kedah".

Zakat pendapatan merupakan konsep zakat al-mal al-mustafad (zakat harta perolehan). Konsep al-mal al-mustafad bermaksud mewajibkan zakat ke atas mana-mana harta perolehan dari hasil usaha tanpa sebarang proses pertukaran (jual-beli), secara ringkasnya ia diperoleh dengan sebabnya tersendiri seperti gaji, upah kerja, elaun, hadiah dan lain-lain.

Negeri Kedah merupakan negeri pertama yang mewajibkan zakat pendapatan melalui fatwa yang telah diwartakan pada tahun 1986 di bawah Enakmen Pentadbiran Agama Islam Tahun 1962 bil.6). Selain itu, keputusan Muzakarah Jawatankuasa Fatwa Majlis Kebangsaan Bagi Hal Ehwal Ugama Islam Malaysia pada tahun 1992 dan 1997 telah bersetuju mewajibkan zakat ke atas hasil pendapatan dan gaji. Ini kerana pendapatan merupakan sebuah harta yang berkembang dan boleh membawa perolehan yang lumayan.

Maka jelaslah di sini, bahawa hukum mengeluarkan zakat pendapatan adalah wajib ke atas individu yang layak. Saya menyeru kepada semua agensi kerajaan dan swasta untuk menunaikan zakat pendapatan supaya pendapatan kita lebih bersih, sempurna dan dapat membantu asnaf untuk mendapatkan kehidupan yang lebih baik.

**Dato' Paduka Syeikh Fadzil
Bin Haji Awang**
DPSS., DSDK., AMK., BCK.
Mufti Negeri Kedah



Seulas Pinang

**KETUA PEGAWAI EKSEKUTIF
LEMBAGA ZAKAT NEGERI KEDAH**

Assalamualaikum Warahmatullahi Wabarakatuh,

Segala puji bagi Allah S.W.T., Tuhan semesta alam, selawat dan salam ke atas junjungan besar Nabi Muhammad SAW, keluarga, sahabat dan seluruh mukmin yang memperjuangkan syari'at Islam.

Terlebih dahulu saya ingin merakamkan penghargaan kepada pihak-pihak yang terlibat di atas usaha murni dalam menerbitkan buku "Zakat Pendapatan: Perlaksanaan Arahan Wajib Di Negeri Kedah".

Zakat pendapatan adalah zakat yang dikenakan ke atas pendapatan yang diperolehi seseorang melalui sumber-sumber yang halal. Saya juga amat menghargai jasa Almarhum Dato' Shaikh Mahmood Naim dan kakitangan pada ketika itu yang bersungguh-sungguh untuk meneroka dan mewujudkan suatu sumber zakat yang baharu dalam menambah dana zakat untuk kepentingan ummah.

Zakat pendapatan merupakan salah satu sumber yang terbesar dalam menyumbang kepada peningkatan kutipan dan agihan zakat di LZNK. Terdapat perincian maklumat mengenai Zakat Pendapatan dan kaedah pengiraan zakat yang dapat dijadikan panduan pembaca dalam buku ini. Saya amat berharap buku ini dapat memberikan manfaat kepada para pembaca, sekaligus menyeru untuk menunaikan zakat pendapatan.

Tuan Syeikh Haji Zakaria Bin Othman

AMK.

**Ketua Pegawai Eksekutif,
Lembaga Zakat Negeri Kedah.**

KANDUNGAN

ISI KANDUNGAN	HALAMAN
Perutusan,	1
YB Setiausaha Kerajaan Negeri Kedah merangkap Pengerusi Lembaga Zakat Negeri Kedah	
Sekapur Sireh,	2
Sahibus Samahah Mufti Kerajaan Negeri Kedah merangkap Pengerusi Jawatankuasa Kecil Kutipan dan Agihan Lembaga Zakat Negeri Kedah	
Seulas Pinang,	3
Ketua Pegawai Eksekutif Lembaga Zakat Negeri Kedah	
Amalan Zakat Pendapatan Di Negeri Kedah	4
Pengiraan Rebat Zakat Dalam Pembayaran Cukai Pendapatan	18
Titah Kebawah Duli Yang Maha Mulia Sultan Negeri Kedah Berkaitan Perlaksanaan Arahan Wajib Potongan Gaji Zakat Pendapatan	24
Fatwa Zakat Pendapatan Di Negeri Kedah Darul Aman	27
Pekeliling Arahan Wajib Potongan Gaji Zakat Pendapatan Bagi Negeri Kedah Darul Aman	30
Rujukan	37

AMALAN ZAKAT PENDAPATAN DI NEGERI KEDAH

A. Pengenalan

Amalan zakat pendapatan di Negeri Kedah bermula sejak tahun 1986 melalui fatwa yang dikeluarkan oleh Jawatankuasa Fatwa Negeri Kedah Darul Aman yang berkuatkuasa mulai daripada 02 Januari 1986.

Fatwa berkenaan dengan zakat gaji dan pendapatan bebas ini dikeluarkan selepas Setiausaha Jawatankuasa Zakat Negeri Kedah merujuk kepada Jawatankuasa Fatwa Negeri Kedah berkenaan dengan ketidakpuasan hati golongan pesawah ketika beliau turun menyampaikan ceramah di masjid dan surau mengenai kesedaran berzakat khususnya berkaitan zakat padi. Pada waktu itu, zakat padi merupakan hasil utama kutipan zakat di Negeri Kedah Darul Aman.

Golongan pesawah mempertikai tindakan Jabatan Zakat Negeri Kedah yang hanya mengutip zakat daripada golongan pesawah yang kebanyakannya merupakan golongan miskin. Namun pada masa yang sama tidak mengutip zakat daripada golongan yang bekerja makan gaji dan profesional bebas serta mempunyai pendapatan yang lebih lumayan. Pada 24 Disember 1984, permasalahan ini dirujuk kepada

Jawatankuasa Fatwa Negeri Kedah dengan mengemukakan bersama kertas kerja berkaitan zakat gaji dan pendapatan bebas oleh Profesor Madya Dr Abdul Rashid Dail, Ketua Jabatan Syariah, Universiti Kebangsaan Malaysia.

Selepas itu, Profesor Madya Dr Abdul Rashid Dail telah dijemput untuk membentangkan kertas kerja berkaitan dengan zakat gaji dan pendapatan bebas pada 13 April 1985 dalam Nadwah Zakat Negeri Kedah, anjuran Jabatan Zakat Negeri Kedah, di Sungai Petani.

Lanjutan daripada pembentangan tersebut, akhirnya Jawatankuasa Fatwa Negeri Kedah pada 27hb Julai 1985 bersetuju bahawa zakat gaji dan pendapatan bebas adalah wajib kepada umat Islam di Negeri Kedah. Fatwa Zakat Gaji dan Pendapatan Bebas ini berkuatkuasa pada 02 Januari 1986 dan diwartakan pada 10 April 1986 di bawah Enakmen Pentadbiran Agama Islam Tahun 1962 Bilangan 9 tahun 1962 seperti berikut :

“Jawatankuasa fatwa telah mengkaji mengenai pembayaran zakat ke atas pendapatan gaji dan lain-lain sumber pendapatan (pendapatan bebas) yang diterima yang ada kaitan dengannya dan bersetuju memberi pandangan bahawa wang gaji, elaun, hadiah dan lain pendapatan yang diberi oleh seseorang dari semasa ke semasa

hendaklah dengan bertaklidkan Mazhab Hanafi disatukan dengan wang yang terkumpul dan hendaklah dizakatkan ketika genap haul yang bermula dari sejak cukup nisab, ini bermakna apa-apa pendapatan yang diperoleh pada pertengahan haul, hendaklah dizakatkan sekali pun belum genap haul bagi tiap-tiap satu pendapatan itu”.

Bagi tujuan perlaksanaan fatwa wajib zakat gaji dan pendapatan bebas yang diwajibkan ke atas umat muslim di Negeri Kedah, dengan perkenan Ke Bawah Duli Yang Maha Mulia Tuanku Sultan Negeri Kedah, Majlis Mesyuarat Kerajaan Negeri Kedah pada tahun 2007 telah meluluskan perlaksanaan arahan wajib pembayaran Zakat Pendapatan menerusi potongan gaji bagi kakitangan kerajaan / badan berkanun / anak syarikat kerajaan negeri. Keputusan ini berdasarkan kepada minit Majlis Mesyuarat Kerajaan Negeri Kedah Darul Aman Kertas No. 6(F)465/2007 seperti berikut :

“Majlis bersetuju menerima pakai pekeliling Arahan Wajib Pembayaran Zakat Pendapatan Menerusi Potongan Gaji Bagi Kakitangan Kerajaan / Badan Berkanun / Anak-anak Syarikat Kerajaan Negeri yang Beragama Islam”.

Keputusan ini selari dengan fatwa wajib zakat gaji dan pendapatan bebas yang difatwakan dan diwartakan sejak tahun 1986. Melalui pekeliling arahan wajib ini, semua majikan kerajaan, badan berkanun dan anak-anak syarikat kerajaan negeri wajib memberikan kerjasama serta membuat taksiran zakat bagi kakitangan yang beragama Islam yang berkelayakan.

Fatwa berkaitan dengan zakat pendapatan sekali lagi dibincangkan pada tahun 2018, dan Mesyuarat Jawatankuasa Fatwa Negeri Kedah Darul Aman yang bersidang pada 26 April 2018 telah bersetuju bahawa :

- I. Perolehan professional bermaksud semua hasil/ imbuhan yang diperoleh daripada kepakaran dan sumbangan dalam apa jua bentuk termasuk bayaran perkhidmatan profesional, khidmat konsultansi, komisen, royalti, honorarium, keuntungan bermusim dan lain-lain perolehan yang berhubung kait dengannya.
- II. Perolehan professional diwajibkan zakat kerana ia termasuk zakat perniagaan.
- III. Oleh itu, mana-mana orang Islam yang mencukupi syarat-syaratnya adalah berkewajipan mengeluarkan zakat ke atas

perolehan professional berdasarkan kepada pendapatan kasar setahun. Kadar zakat yang dikenakan adalah sebanyak 2.5% daripada jumlah keseluruhan perolehan tersebut.

B. Takrif

Zakat pendapatan merupakan zakat yang dikenakan kepada seseorang muslim disebabkan memperolehi hasil pendapatan samada melalui *mal mustafad* atau *mal mustaghallat*.

Mal mustafad bermaksud harta yang diperolehi hasil pekerjaan, pemberian dan sebagainya. Manakala *mal mustaghallat* pula harta yang diperolehi melalui usaha pengembangan harta seperti perniagaan, sewa dan sebagainya.

Para fuqaha telah mewajibkan zakat ke atas hasil pendapatan kerana pendapatan merupakan harta yang berkembang (النماء) dan boleh membawa perolehan yang lumayan terutamanya bagi seseorang yang menyandang jawatan-jawatan profesional atau peringkat tinggi dalam sesebuah organisasi.

Ia juga antara aktiviti perekonomian utama pada zaman ini, apatah lagi pekerjaan yang mempunyai gaji tetap sama ada di sektor kerajaan dan swasta sudah menjadi sebahagian dari sumber rezeki utama dalam

kehidupan sekarang dan dalam masa yang sama, seseorang itu juga menjana pendapatan lain seperti bermiaga, aktiviti sewa, konsultansi dan sebagainya yang memberikan hasil pulangan yang lumayan. Bahkan, daripada hasil pendapatan tersebut seseorang itu perlu membayar cukai kepada pihak berwajib.

Dr. Rif'at Abd Latif Mahyur di dalam kitab zakat dan ekonomi Islam (*Al Zakat : Al Asas Al Syar'iyy Wa Al-Tanmiyy Wa Al-Tauziyy*) menyatakan bahawa, diriwayatkan daripada Ibnu Abbas katanya; “Dia wajib mengeluarkan zakatnya (*harta mustafad*) saat mendapatkannya.” Imam Ahmad Bin Hanbal juga berpegang dengan pandangan ini.

C. Dalil

Antara dalil yang menjadi sumber hukum kepada kewajipan zakat pendapatan adalah berdasarkan firman Allah SWT di dalam Surah Al Baqarah ayat 267 :

يَا أَيُّهَا الَّذِينَ ءَامَنُوا أَنْفَقُوا مِنْ طِبَّاتِ مَا كَسَبْتُمْ وَمِمَّا أَخْرَجْنَا لَكُمْ مِنَ الْأَرْضِ ۚ وَلَا تَيْمِمُوا
الْحُنْيِثَ مِنْهُ تُنْفِقُونَ وَلَسْتُمْ بِإِخْدِيزِهِ إِلَّا أَنْ تُعْمِضُوا فِيهِ ۚ وَاعْلَمُوا أَنَّ اللَّهَ غَنِّيٌّ حَمِيدٌ

Maksudnya: “Wahai orang-orang beriman! Nafkahkanlah (keluarkan zakat) sebahagian daripada hasil usaha kamu yang baik-baik dan sebahagian daripada apa yang kamu keluarkan daripada hasil bumi dan

jangan kamu pilih yang buruk- buruk, pada hal kamu sendiri tidak menyukainya. Ketahuilah Allah Maha Kaya Lagi Sentiasa Terpuji.”

Selain itu, sebuah hadis yang diriwayatkan daripada Abu Musa Asyaa`ri R.A :

عَنْ أَبِي مُوسَى الْأَشْعَرِيِّ عَنِ النَّبِيِّ صَلَّى اللَّهُ عَلَيْهِ وَسَلَّمَ قَالَ : عَلَى كُلِّ مُسْلِمٍ صَدَقَةٌ
قَالُوا : إِنْ لَمْ يَجِدْ؟ قَالَ : فَيَعْمَلُ بِيَدِيهِ فَيَنْفَعُ نَفْسَهُ وَيَتَصَدَّقُ قَالُوا : إِنْ لَمْ يَسْتَطِعْ أَوْ
لَمْ يَفْعَلْ؟ قَالَ : فَيُعِينُ ذَا الْحَاجَةِ الْمُلْهُوفَ قَالُوا : إِنْ لَمْ يَفْعَلْ؟ قَالَ : فَيَأْمُرُ بِالْخَيْرِ أَوْ
قَالَ : بِالْمَعْرُوفِ قَالَ : إِنْ لَمْ يَفْعَلْ؟ قَالَ : فَيُمْسِكُ عَنِ الشَّرِّ فَإِنَّهُ لَهُ صَدَقَةٌ.

Maksudnya: *Daripada Abu Musa Asyaa`ri R.A, daripada Nabi SAW bersabda “Setiap orang Islam diwajibkan sedekah (zakat), mereka berkata kepada Rasulullah: kalau kami tidak memiliki harta, bagaimana? Jawab baginda: Berusahalah kamu dengan sepenuh tenaga bagi menyara diri kemudian bayarlah sedekah (zakat). Mereka berkata lagi: jika usaha kami tidak berhasil? Jawab baginda: Berilah pertolongan kepada orang yang berhajat. Mereka berkata lagi: Kalau kami tidak berupaya? Sabda baginda: Buatlah kebaikan atau perkara ma'ruf. Kalau kami tidak berupaya? Sabda baginda: Maka tahanlah dari melakukan keburukan, sesungguhnya perbuatan itu bagi kamu adalah sadaqah.”*

(Riwayat Al Bukhari)

D. JENIS-JENIS HARTA YANG DIKENAKAN ZAKAT PENDAPATAN

Terdapat 2 kategori pemilikan harta yang dikenakan zakat pendapatan:

I. SUMBER UTAMA PENDAPATAN :

I. Harta Penggajian dan Upah Kerja

ia bermaksud “Harta yang diperolehi oleh seseorang hasil daripada pekerjaan yang dilakukannya untuk pihak lain sama ada kerajaan, swasta atau individu dengan melakukan sebarang usaha dalam bentuk fizikal, sumbangan idea atau kedua-duanya dalam tempoh yang dipersetujui bersama, sama ada secara tahunan, bulanan, mingguan, harian atau jam.” Sebagai contoh :

- a) Gaji
- b) Upah
- c) Bonus
- d) Tuntutan kerja lebih masa
- e) Gratuiti
- f) Pampasan
- g) Pencen
- h) Hadiah, anugerah & insentif
- i) ESOS (Skim Pilihan Saham Pekerja)
- j) Apa-apa yang bersumberkan perkhidmatan atau penggajian

Bagi pendapatan yang diperoleh secara sekaligus disebabkan oleh pekerjaan yang dilakukan seperti gratuiti, pampasan hadiah, anugerah

& insentif perlu dizakatkan sebaik sahaja menerima harta tersebut kerana ianya dianggap pendapatan yang diperolehi dan telah melebihi nisab pada tahun tersebut. (*Rujuk Fatwa Zakat Pendapatan Negeri Kedah, pada tahun 1986*)

Walau bagaimanapun, pendapatan dari sumber-sumber tuntutan selepas perbelanjaan pendahuluan tidak perlu dikeluarkan zakat kerana ianya tidak termasuk di dalam kategori pendapatan.

Sebaliknya ia diperolehi sebagai ganti pendahuluan kos pendahuluan yang terpaksa ditanggung oleh individu dalam menjalankan tugas atau kerja yang dilakukan. Pendahuluan tersebut dibayar menggunakan gaji pekerja yang telah dibayar zakat. Sekiranya diwajibkan zakat, maka akan berlaku zakat sebanyak 2 kali. Sebagai contoh tuntuan elaun perjalanan, lojing dan lain-lain tuntutan yang berkaitan dengan pekerjaan di mana seseorang itu mengeluarkan kos sendiri terlebih dahulu.

II. Harta Dari Hasil Kerja Bebas

laitu harta yang diperolehi oleh seseorang hasil daripada pekerjaan yang dilakukannya sendiri tanpa ada kaitan dengan pihak lain dalam bentuk kerja bebas atau perkhidmatan profesional. Sebagai contoh :

- a. Bayaran perkhidmatan konsultansi profesional seperti khidmat guaman, arkitek, doktor dan sebagainya.
- b. Bayaran projek yang diterima oleh kontraktor.

- c. Keuntungan projek bermusim.
- d. Komisyen dan *residual income* – pendapatan dari jualan insuran, takaful, unit *trust*, broker dan seumpamanya.
- e. Bayaran royalti, honorarium atau komisen yang diterima daripada hasil penulisan, penerbitan, aktiviti seni dan sebagainya.
- f. Hasil tunai sekali sekala seperti hasil pembiayaan semula aset atau hasil jualan aset tetap atau pinjaman bank yang tiada tujuan dan lain-lain.

2. LAIN-LAIN SUMBER PENDAPATAN /PEROLEHAN

I. Harta Dari Hasil Sewaan (*Mustaghallat*)

laitu segala harta yang diperolehi daripada harta yang tidak diwajibkan zakat tetapi mendatangkan pulangan atau pendapatan dengan cara sewaan atau jualan hasilnya seperti :

- a. Hasil sewaan rumah, bangunan, kilang, premis perniagaan dan sebagainya.
- b. Hasil sewaan kenderaan atau pengangkutan.
- c. Hasil sewaan peralatan, aset atau sebagainya.
- d. Hasil yang dikeluarkan oleh binatang ternakan seperti susu dan telur yang dijual.

II. Harta Dari Pemberian atau Sumbangan (*Al-U'tiyyah*)

ia bermaksud “Harta yang diperolehi oleh seseorang bukannya hasil daripada pekerjaan yang dilakukannya. ia merupakan pemberian yang

diterima samada daripada individu atau institusi dalam tahun semasa” dalam berbentuk harta zakawi seperti wang dan bukannya dalam bentuk harta tetap (*al ‘aqar*) seperti rumah dan tanah dan juga bukan merupakan nafkah wajib.

Antara bentuk yang dianggap sebagai pemberian atau sumbangan (*Al-Utiyyah*) yang diperolehi dalam bentuk harta zakawi seperti wang, emas, saham dan sebagainya yang dikenakan zakat ketika diperolehi adalah :

- a. Hibah
- b. Hadiyah
- c. Saguhati
- d. Pencen pasangan
- e. Sedekah
- f. Pampasan
- g. Harta Wasiat

Saidina Muawiyyah merupakan orang pertama yang mengenakan zakat terhadap harta pemberian “Al ‘Utiyyah”. Amalan ini dijuga dilakukan oleh Saidina Umar Abdul Aziz.

E. Kadar Zakat Pendapatan

Kadar zakat pendapatan adalah sebanyak 2.5%

F. Dua Kategori Pembayar Zakat

1. Individu Yang Menerima Gaji Atau Hasil Kerja Bebas Tanpa Lain-Lain Pendapatan

Bagi individu yang hanya menerima gaji, upah dan hasil kerja bebas, zakat pendapatan dikira daripada jumlah gaji yang diterima untuk tempoh setahun. Kaedah pembayaran secara bulanan adalah bagi tujuan meringankan dan memudahkan seseorang individu itu membayar zakat pendapatan.

2. Individu Yang Menerima Gaji Atau Hasil Kerja Bebas dan Mempunyai Lain-lain Sumber Perolehan

Bagi individu yang hanya menerima gaji atau hasil kerja bebas dan mempunyai lain-lain sumber perolehan, zakat pendapatan dikira daripada jumlah gaji dan dicampur dengan lain-lain sumber perolehan untuk tempoh setahun.

Kaedah pembayaran secara bulanan atau dibayar zakat ketika memperolehi lain-lain sumbar adalah bagi tujuan meringankan dan memudahkan seseorang individu itu membayar zakat pendapatan.

G. Kaedah Pengiraan Zakat Pendapatan

1. **KAEDAH A:** Gaji kasar setahun (melebihi paras nisab) x 2.5%.

KATEGORI PENDAPATAN	JUMLAH (RM)
A1. Hasil Penggajian & Upah Tahunan	RM 44,000.00
A2. Lain-lain pendapatan (jika ada)	Tiada
<i>Jumlah Pendapatan Tahunan x 2.5% (kadar wajib zakat)</i>	RM 44,000.00 x 2.5% = RM 1,100.00 (setahun) ÷ 12 bulan = RM 91.70 (sebulan)

2. **KAEDAH B:** Gaji kasar setahun (tolak pelepasan yang dibenarkan) x 2.5%.

BAHAGIAN A: KATEGORI PENDAPATAN	JUMLAH (RM)
A1. Hasil Penggajian & Upah Tahunan	RM 44,000.00
A2. Lain-lain pendapatan (jika ada)	RM 3,000.00
<i>Jumlah Pendapatan Tahunan (A1 + A2)</i>	RM 47,000.00

BAHAGIAN B: TOLAKAN YANG DIBENARKAN	
B. Tolakan	Jumlah (RM)
Diri	RM 9,000.00
Isteri	RM 3,000.00 seorang
Tanggungan Anak	RM 1,000.00 seorang
KWSP (tolakan sebenar setahun)	RM 4,400.00 (cth :11%)
<i>Jumlah Tolakan Tahunan</i>	RM 17,400.00

BAHAGIAN C: PENDAPATAN BERSIH DIZAKAT	JUMLAH (RM)
Jumlah Bahagian A (TOLAK) - (Jumlah Bahagian B)	<p style="text-align: right;">RM 47,000.00</p> <p style="text-align: right;">- <u>RM 17,400.00</u></p> <p style="text-align: right;">RM 29,600.00</p>
<p>Jumlah Pendapatan selepas tolakan x Kadar Wajib</p> <p>Zakat = Amaun (Bahagian C) x (2.5%)</p>	<p style="text-align: right;">RM 29,600.00 x 2.5%</p> <p style="text-align: right;">= RM 740.00 (setahun) ÷</p> <p style="text-align: right;">12 bulan</p> <p style="text-align: right;">RM 61.70 (sebulan)</p>

**PENGIRAAN REBAT ZAKAT
DALAM PEMBAYARAN CUKAI PENDAPATAN**

Zakat dan Rebat Cukai Pendapatan

Bagi umat Islam di Malaysia, pihak kerajaan menerusi Akta Cukai Pendapatan (ACP) 1967, memberikan keistimewaan kepada orang Islam orang Islam yang menunaikan zakat pendapatan untuk mendapat rebat penuh terhadap cukai pendapatan yang dibayar pada tahun tersebut.

Seksyen 6A (3), Akta Cukai Pendapatan (ACP) 1967, menyatakan bahawa :

“Rebat hendaklah diberikan pada tahun-tahun taksiran untuk sebarang bayaran zakat fitrah atau lain-lain tuntutan agama Islam yang mana pembayarannya wajib dan yang telah dibayar dalam tahun asas bagi tahun taksiran itu dan dibuktikan oleh resit yang dikeluarkan oleh pihak berkuasa agama yang berkenaan yang ditubuhkan mengikut undang-undang bertulis”.

Rebat secara umumnya bermakna, jumlah cukai yang dapat dikurangkan dengan pembayaran zakat. Semakin banyak berzakat, semakin sedikit cukai dibayar.

Jika amaun zakatnya menyamai atau melebihi cukai, maka seseorang itu tidak perlu lagi membayar cukai pendapatannya.

Berdasarkan ACP 1967, Seksyen 6A (3) di atas, tidak dinyatakan jumlah amaun tertentu atau batas amaun dalam rebat ke atas cukai. Berdasarkan keluasan tafsiran pembayaran zakat tersebut, maka pembayar yang membuat potongan gaji zakat bulanan boleh meniatkan pembayaran zakat tersebut ke atas lain-lain harta yang wajib dizakatkan seperti zakat emas, zakat saham, zakat wang simpanan, Kumpulan Wang Simpanan Pekerja, qada' zakat terdahulu ke dalam bayaran zakat menerusi 'potongan zakat pendapatan' semasa sekiranya bayaran zakat melebihi kadar 2.5 % kerana membayar zakat mengikut jumlah bayaran cukai pendapatan atau mengikut jumlah Potongan Cukai Berjadual (PCB).

Info Cukai Pendapatan Dan Potongan Cukai Berjadual (PCB)

Apa itu Cukai Pendapatan?

Cukai Pendapatan adalah cukai yang dikenakan kepada individu yang mempunyai pendapatan tahunan melebihi tahap minimum yang ditetapkan oleh Lembaga Hasil Dalam Negeri (LHDN) [perlu rujuk jadual yang disediakan oleh LHDN]. Cukai pendapatan akan dikira selepas cukup setahun majikan mengeluarkan penyata pendapatan kakitangan / individu.

Apa itu Potongan Cukai Berjadual?

Potongan Cukai Berjadual (PCB) adalah satu kaedah pembayaran cukai pendapatan secara potongan gaji bulanan. PCB akan dijalankan oleh majikan mengikut jadual yang telah ditetapkan oleh LHDN.

CONTOH PENGIRAAN CUKAI PENDAPATAN DAN REBAT CUKAI PENDAPATAN

Seorang individu selepas taksiran cukai pendapatan perlu membayar sejumlah RM 20,000.00 cukai pendapatan pada tahun tersebut. Jika mempunyai resit pembayaran zakat pendapatan, maka individu tersebut layak mendapat rebat seperti berikut :

Bayaran Zakat Pendapatan Dengan Kadar 2.5%

Jika individu tersebut membayar zakat sejumlah RM 6,000.00, maka jumlah cukai yang perlu dibayar adalah RM 46,065.00.

Contoh Pengiraan Cukai Pendapatan :

PERKARA	RM	RM
Jumlah pendapatan		280,000
Tolak: Potongan dibenarkan		
• Diri dan saudara tanggungan	9,000	
• Isteri	4,000	13,000
	—	267,000
Pendapatan bercukai		
Cukai atas pendapatan bercukai RM250,000 yang pertama		47,900.00
Cukai atas baki pendapatan bercukai RM17,000 @ 24.5%		4,165.00
	—	52,065.00
Cukai pendapatan dikenakan		
Tolak: Rebat zakat		6,000.00
Cukai pendapatan kena dibayar		46,065.00
	—	—

Bayaran Zakat Pendapatan Mengikut Jumlah Cukai Pendapatan

Jika individu tersebut membuat bayaran zakat mengikut jumlah cukai pendapatan samaada melalui Potongan Gaji Berjadual (PCB) atau dengan kaedah pembayar terus, maka individu tersebut tidak perlu membayar cukai pendapatan kerana mendapat 100% rebat daripada zakat yang ditunaikan.

PERKARA	RM	RM
Jumlah pendapatan		280,000
Tolak: Potongan dibenarkan		
• Diri dan saudara tanggungan	9,000	
• Isteri	4,000	13,000
Pendapatan bercukai		267,000
Cukai atas pendapatan bercukai RM250,000 yang pertama		47,900.00
Cukai atas baki pendapatan bercukai RM17,000 @ 24.5%		4,165.00
Cukai pendapatan dikenakan		52,065.00
Tolak: Rebat zakat		52,065.00
Cukai pendapatan kena dibayar		Tiada

**TITAH KDYMM SULTAN KEDAH BERKENAAN DENGAN ARAHAN
WAJIB ZAKAT PENDAPATAN**

Assalamualaikum Warahmatullahi Wabarakatuh.

Bismillahirrahmanirrahim.

Dengan Nama Allah, Yang Maha Pemurah, Lagi Maha Mengasihani.

Selawat dan salam, ke atas junjungan mulia, Nabi Muhammad, Sollallahu Alaihi Wa sallam, serta ahli keluarga Baginda, dan para sahabat sekalian.

Alhamdulilah, Beta bersyukur ke hadrat Allah Subhanahu Wa-ta'ala, kerana dengan limpah rahmat, dan kasih sayang-Nya, maka dapatlah Beta, berangkat hadir, ke Majlis Perasmian, Pusat Bekalan Makanan Fakir dan Miskin, atau-pun lebih dikenali sebagai, 'Foodbank' Lembaga Zakat Negeri Kedah, dan Pelancaran Sambutan 350 Tahun, Seruan Berzakat di Negeri Kedah, pada hari ini.

Berdasarkan sejarah, Negeri Kedah merupakan negeri pertama, di Semenanjung Tanah Melayu, yang menyeru rakyatnya, menuaikan zakat, melalui Undang-Undang Seruan Berzakat, di Negeri Kedah. Ianya telah bermula, sejak tahun 1667 lagi, apabila Sultan Dhiauddin Mukarram Shah 1, telah memerintahkan kepada pembesarnya ketika itu, iaitu Dato' Seri Paduka Tuan, supaya menulis Undang-Undang Negeri Kedah.

Di dalam Fasal 3, Undang-Undang tersebut, terkandung akan titah, Sultan Dhiauddin Mukarram Shah 1, kepada seluruh rakyat Negeri Kedah, yang berbunyi,

“Barang siapa berbuat bendang atau huma, maka hendaklah suruh dikeluarkan zakat, seperti benar hisab yang diperolehnya itu, suruh dikeluarkan, satu per sepuluh zakatnya itu. Sekiranya mereka engkar, maka hendaklah para penghulu, mengambil zakat itu, menurut seperti hukum Allah Taala.”.

Kini, setelah 350 tahun berlalu, proses pemantapan dan penambahbaikan tadbir urus, yang dilaksanakan oleh Lembaga Zakat Negeri Kedah, telah berjaya mencapai, pencapaian yang membanggakan, sehingga ke peringkat antarabangsa. Melalui platform “Kedah International Zakat Academy”, Lembaga Zakat Negeri Kedah, telah berjaya berkongsi ilmu dan pengalaman, dalam pengurusan zakat, kepada seluruh agensi, dan institusi zakat, disegenap peringkat.

Pada bulan Disember 2019, Lembaga Zakat Negeri Kedah, telah menerima kunjungan, daripada Sokoto State Zakat and Endowment Commission, Nigeria. Hari ini, kita turut menerima satu lagi kunjungan, daripada delegasi, House of Zakat and Waqf Uganda, yang datang untuk mempelajari pengurusan zakat, di Negeri Kedah, untuk dilaksanakan, di Negara Uganda.

Bagi menghadapi fasa ekonomi digital, Beta berasa sukacita kerana, pengurusan Lembaga Zakat Negeri Kedah, telah memulakan usaha untuk ‘mendigitalkan’, operasi kutipan dan agihan zakat Negeri Kedah, dengan pelaksanaan system ‘Zakat On Touch’, di mana masyarakat

awam boleh mengetahui, jumlah kutipan dan agihan zakat, di Negeri Kedah secara ‘real time’, dan kepada siapa wang zakat tersebut diagihkan, secara telus.

Ianya selari dengan Visi Lembaga Zakat Negeri Kedah, iaitu menjadi institusi kewangan sosial Islam, yang unggul dan bertaraf dunia.

Beta menitahkan, kepada semua ketua jabatan, di agensi kerajaan dan swasta, untuk melaksanakan, arahan wajib potongan gaji, untuk zakat pendapatan, mengikut taksiran yang betul, bagi kakitangan awam dan swasta, yang mempunyai pendapatan, melebihi nisab yang telah ditetapkan.

Beta turut menitahkan, kepada setiap individu, agensi dan syarikat korporat, yang bekerja dan beroperasi di Negeri Kedah, haruslah membayar zakat, kepada Lembaga Zakat Negeri Kedah.

Selaku Ulil Amri di Negeri Kedah ini, Beta berhasrat dan ingin memastikan, agar para asnaf di Negeri Kedah, yang layak menerima zakat, mendapat hak mereka yang sewajarnya.

Beta berasa bangga, dengan kejayaan pada tahun 2019 yang lalu, dimana Lembaga Zakat Negeri Kedah, telah berjaya mencatatkan pengagihan berjumlah, Ringgit Malaysia, Seratus Sembilan Puluh Empat, Perpuluhan Sembilan Juta.

Bagi tujuan, mengangkat martabat institusi masjid, Lembaga Zakat Negeri Kedah, telah mengagihkan zakat, melalui Penolong Amil yang

dilantik, dengan melaksanakan program ‘Foodbank’ di semua masjid, di seluruh Negeri Kedah Darul Aman.

Melalui pelaksanaan program ini, ianya telah berjaya memberi manfaat, kepada Tujuh Belas Ribu, Dua Ratus Lapan Puluh, buah keluarga pada setiap bulan.

Beta amat yakin, tindakan proaktif dengan mengadakan Pusat Bekalan Makanan ini, ianya dapat mengatasi isu rakyat, di Negeri Kedah, berkaitan masalah kelaparan, dan terputus bekalan makanan, serta ianya, dapat menaikkan imej, institusi masjid dan institusi zakat di mata masyarakat.

Kewujudan Pusat Bekalan ini, juga dapat memberi peluang, kepada semua syarikat korporat, agensi dan individu perseorangan, untuk turut membantu memberi sumbangan, kepada Pusat Bekalan Makanan ini, melalui kaedah bersedekah, atau Tanggungjawab Sosial Korporat (CSR) syarikat tersebut.

Semoga, Allah Subhanahu Wata’ala, memberikan keberkatan, kepada anda semua, serta kemakmuran dan kesejahteraan, kepada seluruh rakyat di Negeri Kedah Darul Aman.

Akhir titah, dengan lafaz “Bismillahhirrahmanirrahim,

Beta merasmikan, Pusat Bekalan Makanan Fakir dan Miskin, Lembaga Zakat Negeri Kedah, dan Sambutan 350 Tahun Seruan Berzakat, di Negeri Kedah.

Wabillahitaufik, Walhidayah,

Wassalamualaikum, Warahmatull'ahi, Wabarakatuh.

Titah Ucapan Kebawah Duli Yang Maha Mulia Tuanku Sultan Kedah Darul Aman Di Majlis Perasmian Pusat Bekalan Makanan Fakir Dan Miskin (Foodbank) Lembaga Zakat Negeri Kedah Dan Pelancaran Sambutan 350 Tahun Seruan Berzakat Di Negeri Kedah Di TH Hotel & Convention Centre, Alor Setar, Pada Hari Selasa 10 Rabiul Akhir 1441 Bersamaan Bersamaan 4 Februari 2020.

**FATWA ZAKAT PENDAPATAN
DI NEGERI KEDAH DARUL AMAN**

**Fatwa Pertama : Fatwa Zakat Gaji dan Pendapatan Bebas
(Diwartakan)**

Pemberitahuan Di Bawah Seksyen 38 (2)

Pada menyatakan kuasa-kuasa yang diberikan oleh seksyen 38 (2) Undang-undang Pentadbiran Agama Islam Tahun 1962, Kebawah Duli Yang Maha Mulia Sultan dengan ini mengarahkan supaya Fatwa yang diberi oleh Majlis pada 9hb Zulhijjah 1405 bersamaan dengan 27hb Julai 1985 berikut dimaklumkan kepada umum sebagai fatwa yang berkuatkuasa diatas orang-orang Islam yang duduk di dalam Negeri Kedah mulai daripada 2hb Januari 1986.

“Jawatankuasa fatwa telah mengkaji mengenai pembayaran zakat ke atas pendapatan gaji dan lain-lain sumber pendapatan yang diterima yang ada kaitan dengannya dan bersetuju memberi pandangan bahawa wang gaji, elaun, hadiah dan lain pendapatan yang diberi oleh seseorang dari semasa ke semasa hendaklah dengan bertaklidkan Mazhab Hanafi disatukan dengan wang yang terkumpul dan hendaklah dizakatkan ketika genap haul yang bermula dari sejak cukup nisab, ini bermakna apa-apa pendapatan yang diperoleh pada pertengahan haul, hendaklah dizakatkan sekali pun belum genap haul bagi tiap-tiap satu pendapatan itu”.

Fatwa Zakat Pendapatan ini telah diwartakan pada 10 April 1986 di bawah Enakmen Pentadbiran Agama Islam Tahun 1962 Bilangan 9 tahun 1962.

Fatwa Kedua : Zakat Ke Atas Perolehan Professional

Warta Kerajaan Negeri Kedah Darul Aman, 28 Mac 2019, No 218.

Pemberitahuan Fatwa Di Bawah Seksyen 23 Dan 24.

Zakat ke atas Perolehan Professional

Pada menjalankan kuasa yang diberikan oleh subseksyen 23(3) dan 24(4) Enakmen Mufti dan Fatwa (Kedah Darul Aman) 2008 Jawatankuasa Fatwa dan atas titah perintah Kebawah Duli Yang Maha Mulia Sultan Negeri Kedah Darul Aman dengan ini menyiarakan fatwa seperti dinyatakan dalam Jadual.

JADUAL

Berdasarkan Keputusan Mesyuarat Jawatankuasa Fatwa Negeri Kedah Darul Aman yang bersidang pada 28 Oktober 2018, inilah diputuskan fatwa untuk diguna pakai di Negeri Kedah Darul Aman seperti berikut :

1. Perolehan professional bermaksud semua hasil / imbuhan yang diperoleh daripada kepakaran dan sumbangan dalam apa ju bentuk termasuk bayaran perkhidmatan profesional, khidmat konsultansi, komisen, royalti, honorarium, keuntungan bermusim dan lain-lain perolehan yang berhubung kait dengannya.
2. Perolehan professional diwajibkan zakat kerana ia termasuk zakat perniagaan. Oleh itu, penerima perolehan tersebut hendaklah mengeluarkan zakat apabila cukup nisab dengan bertaqlid kepada mazhab Hanafi berdasarkan dalil berikut:

a) Firman Allah SWT :

يَا أَيُّهَا الَّذِينَ آمَنُوا أَنْفَقُوا مِنْ طِبَّاتِ مَا كَسَبُتُمْ.....

Maksudnya : Hai orang-orang yang beriman, nafkahkanlah (di jalan Allah) sebahagian dari hasil usahamu yang baik-baik.
(Al-Baqarah-ayat-267)

Merujuk ayat di atas, Dr yusuf al-Qaradhawi menegaskan bahawa mana-mana keuntungan yang diperolehi daripada usaha yang baik maka berkewajipan ke atas mereka memberi sedekah daripadanya.

(Fiqhuz Zakah, jilid 2 1969, halaman 511)

- b) Jumhur Ulama' berpandangan bahawa zakat harta boleh dikeluarkan lebih awal daripada waktu yang sepatutnya dengan syarat harta tersebut telah mencukupi nisab berdasarkan firman Allah SWT :

وَأَتُوا حَقَّهُ يَوْمَ حَصَادِهِ

Maksudnya : Dan keluarkanlah haknya (zakatnya) pada hari memetik atau menuainya (Surah al-An'am Ayat : 141)

- c) Menurut Imam ad-Damir, an-Najmu al-Wahhaju fi Syarh al-minhaj, halaman 252:

"تُحِبُّ الزَّكَاةَ عَلَى الْفُورِ إِذَا تَمَكَّنَ وَذَلِكَ بِحُضُورِ الْمَالِ وَلَا صِنَافٍ"

Maksudnya : Diwajibkan mengeluarkan zakat dengan segera apabila cukup nisab dan wujud hasil dan asnaf pada masa yang sama.

3. Oleh itu, mana-mana orang Islam yang mencukupi syarat-syaratnya adalah berkewajipan mengeluarkan zakat ke atas perolehan profesional berdasarkan kepada pendapatan kasar setahun. Kadar zakat yang dikenakan adalah sebanyak 2.5% daripada jumlah keseluruhan perolehan tersebut.

Bertarikh : (JMNK(F)603 Jld.2(56): PUN(KD) 600-1/5/3)

DATO' SYEIKH FADZIL B. H.J. AWANG, DSDK., AMK., BCK.

Muftí Negeri Kedah Darul Aman.

**PEKELILING ARAHAN WAJIB POTONGAN GAJI ZAKAT
PENDAPATAN
BAGI NEGERI KEDAH DARUL AMAN
PENETAPAN PELAKSANAAN WAJIB PEMBAYARAN ZAKAT
PENDAPATAN MENERUSI POTONGAN GAJI BAGI KAKITANGAN
KERAJAAN/ BADAN BERKANUN/ ANAK-ANAK SYARIKAT
KERAJAAN NEGERI YANG BERAGAMA ISLAM DAN BERKHIDMAT
DI NEGERI KEDAH.**



**PEJABAT SETIAUSAHA KERAJAAN
NEGERI KEDAH DARUL AMAN**

ARAS 2, BLOK 'A', WISMA DARUL AMAN
JALAN TUNKU BENDAHARA
05503 ALOR STAR, KEDAH DARUL AMAN



SETIAUSAHA KERAJAAN
KEDAH DARUL AMAN

Telefon : 04 730 1212 / 04 730 8008 Faks : 04 731 0000 / 04 700 7083
E-mail : syedunan@kedah.gov.my HTTP ://www.kedah.gov.my

PSU(K)

24 Januari 2008

Seperti Senarai Edaran

Y.B. Dato'/ Y.Bhg Dato'/ Tuan / Puan,

**PEKELILING : ARAHAN WAJIB PEMBAYARAN ZAKAT PENDAPATAN MENERUSI
POTONGAN GAJI BAGI KAKITANGAN KERAJAAN / BADAN BERKANUN / ANAK-
ANAK SYARIKAT KERAJAAN NEGERI YANG BERAGAMA ISLAM DAN
BERKHIDMAT DI NEGERI KEDAH**

Dengan segala hormatnya perkara di atas adalah dirujuk.

2. Dimaklumkan bahawa Majlis Mesyuarat Kerajaan Negeri Kedah Darul Aman di dalam mesyuaratnya pada 28 November 2007, Kertas No. 6(F)465/2007 telah bersetuju seperti berikut:

"Majlis bersetuju menerima pakai pekeliling Arahan Wajib Pembayaran Zakat Pendapatan Menerusi Potongan Gaji Bagi Kakitangan Kerajaan / Badan Berkanun / Anak-anak Syarikat Kerajaan Negeri yang beragama Islam".

3. Sehubungan itu, pihak Y.Bhg Dato' diarah untuk memberi kerjasama dan sokongan sepenuhnya kepada pihak Jabatan Zakat Negeri Kedah dalam hal-hal berikut:

- 3.1. Menghubungkan pihak Jabatan Zakat Negeri Kedah kepada bahagian yang menyediakan gaji kakitangannya dan memberi kebenaran untuk Jabatan Zakat Negeri Kedah membantu membuat taksiran kelayakan zakat kepada setiap individu kakitangan berdasarkan kepada pernyataan gaji yang terkini.
- 3.2. Mengumpulkan kakitangan untuk diberikan taklimat khas perlaksanaan.
- 3.3. Memastikan perlaksanaan potongan berjalan lancar setelah tempoh 14 hari diberikan kepada kakitangan.

Sekian, terima kasih.

"**BERKHIDMAT UNTUK NEGARA**"

(DATO' WIRA HAJI SYED UNAN MASHRI BIN SYED ABDULLAH,
DGMK.,DSDK.,BMS.,AMK.,BCK.)

(DATO' BIJAYA INDERA)

Setiausaha Kerajaan Negeri Kedah,
Merangkap Pengurus Jawatankuasa Zakat Kedah

"KEDAH SEJAHTERA"



**PEKELILING ARAHAN WAJIB POTONGAN GAJI ZAKAT
PENDAPATAN
BAGI NEGERI KEDAH DARUL AMAN
PENETAPAN PELAKSANAAN WAJIB PEMBAYARAN ZAKAT
PENDAPATAN MENERUSI POTONGAN GAJI BAGI KAKITANGAN
KERAJAAN/ BADAN BERKANUN/ ANAK-ANAK SYARIKAT
KERAJAAN NEGERI YANG BERAGAMA ISLAM DAN BERKHIDMAT
DI NEGERI KEDAH.**

Dikelilingkan kepada:

Semua Muslim dan Muslimat Warga Kerja,

Kerajaan Persekutuan / Negeri / Badan- Badan Berkanun / Anak- Anak Syarikat Kerajaan Negeri yang berkhidmat di negeri Kedah Darul Aman.

1. TUJUAN

1.1 Pekeliling ini bertujuan untuk melaksanakan pembayaran Zakat Pendapatan menerusi potongan gaji bulanan (Skim Barakah).

2. PERLAKSANAAN

Ke Bawah Duli Yang Maha Mulia Tuanku Sultan Negeri Kedah menimbang dan meluluskan ketetapan perlaksanaan arahan wajib pembayaran Zakat Pendapatan menerusi potongan gaji bagi kakitangan kerajaan / badan berkanun / anak syarikat kerajaan negeri seperti syor yang berikut:

- 2.1 Pendekatan pengiraan Zakat Pendapatan individu yang akan digunakan untuk Kakitangan adalah gaji kasar setahun (tertakluk melebihi paras nisab) x 2.5%.
- 2.2 Perlaksanaan pemotongan gaji secara **automatik** berdasarkan amaun yang ditaksirkan oleh Lembaga Zakat Negeri Kedah kecuali sekiranya kakitangan memberikan maklum balas untuk tidak bersetuju dengan amaun yang ditaksirkan dan memilih kadar yang diguna pakai oleh Lembaga Zakat Negeri Kedah dalam tempoh 14 hari bekerja dari tarikh penerimaan pekeliling ini.
- 2.3 Perlaksanaan wajib potongan Zakat Pendapatan ini dikuatkuasakan kepada kakitangan kepada kerajaan sama ada Persekutuan / Negeri / Badan Berkanun / Anak-Anak Syarikat Kerajaan Negeri yang beragama islam dan berkhidmat di Negeri Kedah Darul Aman.

3. TANGGUNGJAWAB

- 3.1 Adalah menjadi kewajipan bagi setiap umat Islam yang cukup syarat-syaratnya untuk menunaikan Zakat ke atas sumber penggajian / pendapatan yang merupakan salah satu sumber utama harta yang dimiliki.
- 3.2 Seruan kewajipan menunaikan Zakat Pendapatan yang merupakan cabang daripada harta adalah seperitimana yang terkandung di dalam Firman Allah SWT dalam Surah Al- Baqarah ayat 267:

“Wahai orang-orang yang beriman! Belanjakanlah sebahagian dari hasil usaha kamu yang baik-baik dan sebahagian dari apa yang kami keluarkan dari bumi untuk kamu...”

4. HIKMAH BERZAKAT

- 4.1 Zakat Pendapatan yang ditunaikan tidak akan mengurangkan harta yang dimiliki dan ini bertepatan dengan maksud Hadis Rasulullah S.A.W diriwayatkan oleh At- Tarmizi.

“Ada tiga perkara yang saya bersumpah benar-benar terjadi dan Akan saya ceritakan kepadamu maka ingatlah baik-baik iaitu Tidaklah akan berkurang harta disebabkan Zakat dan tidak teraniaya seorang hamba yang diterimanya dengan hati sabar kecuali Allah akan menambah kemuliaannya, serta tidak membuka seorang hamba pintu meminta kecuali akan dibukakan Allah baginya pintu kemiskinan”

- 4.2 Allah SWT pasti akan memberikan ganjaran kepada Zakat Pendapatan yang ditunaikan dengan penuh keikhlasan, maksud firman Allah S.W.T dalam Surah Al - Baqarah Ayat 261:

“Bandingan orang-orang yang membelanjakan hartanya pada Jalan Allah, ialah sama seperti sebiji benih yang tumbuh Menerbitkan tujuh tangkai, tiap tangkai itu pula mengandungi Seratus biji dan Allah akan melipatgandakan pahala bagi sesiapa Yang dikehendaki-NYA dan Allah Maha luas rahmat kurnia- NYA, Lagi meliputi ilmu pengetahuan-NYA.”

5. FATWA ZAKAT PENDAPATAN

- 5.1 Berhubung dengan kewajipan menuaikan Zakat Pendapatan, fatwa yang berkaitan telah diwartakan pada 10 April 1986 di bawah Enakmen Pentadbiran Agama Islam Tahun 1962 Bilangan 9 tahun 1962 yang berbunyi:

“Jawatankuasa fatwa telah mengkaji mengenai pembayaran zakat ke atas pendapatan gaji dan lain-lain sumber pendapatan yang diterima yang ada kaitan dengannya dan bersetuju memberi pandangan bahawa wang gaji, elaun, hadiah dan lain pendapatan yang diberi oleh seseorang dari semasa ke semasa hendaklah dengan bertaklidkan Mazhab Hanafi disatukan dengan wang yang terkumpul dan hendaklah dizakatkan ketika genap haul yang bermula dari sejak cukup nisab, ini bermakna apa-apa pendapatan yang diperoleh pada pertengahan haul, hendaklah dizakatkan sekali pun belum genap haul bagi tiap-tiap satu pendapatan itu’.

6. KAE DAH PENGIRAAN ZAKAT PENDAPATAN

6.1 Di antara pendekatan pengiraan Zakat Pendapatan yang diamalkan oleh Lembaga Zakat Negeri Kedah terbahagi kepada dua kaedah iaitu:

6.1.1 Gaji kasar setahun (tertakluk melebihi paras nisab) $\times 2.5\%$

6.1.2 Gaji kasar setahun ditolak pelepasan iaitu untuk Diri (lelaki/wanita) = RM 9,000, Isteri (bagi lelaki) = RM 3,000, Anak-anak = RM 1,000/ seorang anak (tertakluk baki melepassi paras nisab) $\times 2.5\%$.

7. TAKSIRAN ZAKAT YANG WAJIB

7.1 Bagi melaksanakan pembayaran Zakat menerusi potongan gaji ini hanya satu kaedah akan digunakan sebagaimana para 6.1.1 dengan mengambil kira maklumat asas pendapatan bulanan.

(Sila lihat **Lampiran A (PW 01)** bagi mengetahui jumlah Zakat yang telah Ditaksirkan oleh Lembaga Zakat Negeri Kedah)

7.2 Sungguhpun demikian tuan-tuan dan puan-puan boleh melengkapkan maklumat dengan menggunakan salah satu kaedah seperti di para 6.1.1 (sebagaimana Cadangan Taksiran Lembaga Zakat Negeri Kedah) atau 6.1.2 di atas dan diserahkan kembali maklum balas tersebut seperti **Lampiran B (PW 02)**.

8. BORANG MAKLUM BALAS (LAMPIRAN B) PERLU DISERAHKAN KEMBALI DALAM TEMPOH 14 HARI BEKERJA DARI TARikh TERIMAAN SURAT PEKELILING

8.1 Sekiranya ada tuan-tuan dan puan-puan yang tidak bersetuju dengan kaedah kiraan Zakat asal oleh Lembaga Zakat Negeri Kedah bolehlah mengemukakan surat maklum Balas tersebut tersebut kepada:

Dato' Wira Haji Syed Unan Mashri Bin Syed Abdullah
DGMK., DSDK., BMS., AMK., BCK., BPL.,
(DATO' Bijaya Indera)
Pengerusi Jawatankuasa Lembaga Zakat Negeri Kedah,
Tingkat 10, Menara Zakat,
Jalan Telok Wanjah,
05200 Alor Star, Kedah Darul Aman.
(u/p : Dato' Setiausaha Jawatankuasa Zakat Negeri Kedah)

9. REBAT CUKAI BULANAN

9.1 Bagi kakitangan yang tertakluk kepada potongan cukai bulanan (PCB), setiap nilai dari zakat yang dibayar akan mendapat pengurangan secara terus dan nilai PCB tersebut.

9.2 Sekiranya terdapat lebihan zakat maka lebihan tersebut boleh dibawa ke hadapan untuk ditolak daripada PCB bagi bula

berikutnya. Walaubagaimanapun, pelarasan sedemikian hanya dibenarkan pada tahun yang sama sahaja.

10. RUMUSAN

Komitmen dan kesedaran tuan / puan dalam menjayakan perlaksanaan ini pastinya akan memberi manfaat kepada asnaf penerima zakat khususnya para fakir miskin di negeri Kedah Darul Aman. Kakitangan Kerajaan Persekutuan / Negeri / Badan- Badan Berkanun / Anak- Anak Syarikat Kerajaan Negeri yang berkhidmat di negeri Kedah Darul Aman akan terus berkembang, dilindungi dan diberikan Allah SWT serta dijauhi dari bala bencana.

11. TARIKH BERKUAT KUASA

Surat Pekeliling ini berkuat kuasa mulai daripada Tarikh ianya dikeluarkan. Sekian, terima kasih.

'BERKHIDMAT UNTUK AGAMA DAN NEGARA'

**Dato' Wira Haji Syed Unan Mashri Bin Syed Abdullah
DGMK., DSDK., BMS., AMK., BCK., BPL.,
(DATO' Bijaya Indera)
Setiausaha Kerajaan Negeri Kedah,
Merangkap
Pengerusi Lembaga Zakat Negeri Kedah.**

RUJUKAN

1. Koleksi Fatwa Zakat Negeri Kedah Darul Aman, Bahagian Dakwah dan Penyelidikan, LZNK.
2. Fatwa Sistem Pengurusan Kutipan Zakat Negeri Selangor 2013.
3. Himpunan Risalah Zakat daripada Syeikh Mahmood Naim.
4. Fiqh zakat, Dr. Yusuf A-Qaradhwai.

APLIKASI **Zakat on Touch**

MUAT- TURUN
SEKARANG



[zakat on touch](#) 

 ANDROID APP ON Google play

 Download on the App Store



LEMBAGA ZAKAT NEGERI KEDAH
Aras 3, Menara Zakat,
Jalan Teluk Wan Jah,
05200, Alor Setar,Kedah

 Tel : 04-733 1740
 Faks : 04-732 0634